



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIAL

Komunikadu Imprensa

4 Marsu 2013

Ministériu Públiku alega tinan 7 prizaun ba krime burla agravada no conseitu funcionáriu

Iha 28 Feveireiru 2013, Tribunál Distritál Dili hala'o audiénsia julgamentu kontinuasaun ba sesaun alegasaun finál. Audiénsia ne'e hala'o hodi hato'o alegasaun finál husi Ministériu Públiku no defeza ba krime abuzu konfiansa, burla agravada no conseitu funcionáriu ne'ebé involve arguidu na'in rua inisiál GdAA no CHQ. Kazu ne'e akontese iha internál partidu ASDT, iha tinan 2012.

"Julgamentu ba kazu ne'e importante tebes atu asegura katak utilizasaun orsamentu estadu nian refléta tuir nesesidade no alvu no evita pratika hanesan iha futuru ," dehan Diretor Ezekutivu JSMP Luis de Oliveira Sampaio.

Iha alegasaun finál, bazeia ba depoimentu testemuna sira, Ministériu Públiku alega katak, orsamentu ne'ebé mai husi CNE loloos tenki hetan rekoñesimentu husi Prezidente ASDT ne'ebé eleitu iha Kongresu Nasionál Partidu ASDT iha Aileu iha data 28 Abril 2012.

Tuir Ministériu Públiku, relatóriu gastus orsamentu versaun arguidu sira nian ne'e falsu tanba depois sira simu tiha karta pedidu husi CNE no desizaun Tribunál Rekursu, sira la iha lejitimidade atu kontinua uza orsamentu refere ba atividade partidu tanba iha ona estrutura partidu foun ne'ebé hetan rekuñesimentu direkta husi Tribunál Rekursu.

Relasiona ho krime hirak ne'e, Ministériu Públiku husu ba tribunál atu fó pena prizaun tinan 7 ba arguidu GdAA no tinan 6 ba arguidu CHQ. Enkuantu akuzasaun ba krime abuzu konfiansa, Ministériu Públiku intrega ba tribunál atu livre apresiasaun.

Hatan ba alegasaun ne'e, defeza husu ba tribunál atu absolve arguidu sira husi akuzasaun tanba bazeia ba deklarasaun arguidu no depoimentos husi testemuna sira la hatudu provas profundu katak sira uza orsamentu refere hodi hariku aan maibé orsamentu ne'ebé aloka husi CNE, arguidu fo fali ba lideransa eleitu partidu ASDT nian.

Kazu ne'e rejista iha tribunál ho Nú. Prosesu: 536/C.Ord/2012/TDD. Julgamentu ba kazu ne'e prezide husi tribunal koleтиву ne'ebé kompostu husi Dr. José Maria de Araújo, Dr. Paulo Texeira no Dr. Duarte Tilman. Ministériu Públiku representa Dr. José Ximenes no arguidu hetan defeza husi Dr. José Guterres, advogadu privadu.

Leitura ba akordaun sei hala'o iha loron 21/3/2013, tuku 11:00

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883